

奪淮而後注海而禹蹟遂不可復矣夫治河之法自漢迄今代有成規而潘季馴束清刷黃之說尤切實可見諸施行彼束清壩禦黃壩清黃之關鍵也堅築高家堰蓄洪澤湖所注全淮之水以七分入清口刷黃入海而以三分入運河自山陽寶應高郵江都三百里內以達之江則治河即以通漕而河道深通南北重空運自無阻滯矣自在善治河者因時度勢或設磯礧以禦其衝或修月隄以防其潰或挑引河以殺其流而其大旨不外助淮以敵河使淮治而河亦治合黃淮以治漕使黃淮治而漕亦治則河流順軌漕艘通行疏導有方誠萬世永賴之休一勞永逸之策乎 聖天子屢念民依其所以爲羣生謀奠安之業者德固至渥也 制策又以選賢任能政之樞要而欲以一代賢能分任乎一代之治此又熙績釐工之治也臣惟古者德行之選見於司徒三載賓興始廣登進之路蓋所選者其德器

必過人而責效在專其任其在堯舜之世臯夔稷契各守一官其所爲汝翼汝爲汝明汝聽者胥賴臣鄰美哉堂廉一心主臣合德明良喜起之歌風虎雲龍之會豈非千載一時哉三代用人首德行次才能誠以德行本也才能末也漢舉孝廉及賢良方正制爲近古魏則立九品官人之法而不免有或損或難之譏唐有制科而制科之外其擇人又有四事焉崔祐甫薦舉日除數十人未逾年除吏幾八百員宋司馬光云專引知識則嫌於私止循次序未必皆才此十科舉士之條所由設也夫賢才登進則治道臻於昌明 聖朝崇尚實學加意人才爲士者敢不砥行立名爭自磨濯哉 制策又以自古治平不忘武備而使任將帥之責者勤於訓練以振國威而懾荒服此誠足兵之要圖也臣按古者寓兵於農周禮所載鄉遂郊甸皆因井田之制賦居則爲比閭族黨出則爲伍兩卒旅制誠善矣而又振旅